

Yemusi

Yemusikafo Isilaeli wenina Yesu holi hikito muwabo ya lufuwa i fulo betibo ha

Homu Ha

Lufuwa me ya ibo we Yemusi, ya Yesu unalafa ne. (Matiu 13:55) Homu ya Yemusite unalafa-motate Yesu holi hikito umámafa, aliga Yesu fuliguti sinoito ya lutina-hatina li elepa iti holi hikitabo ne. (Yoni 7:3-5) Ido Yemusi ya Yelusalemu numudoka monolo nuba o-o abo wenina hiyabatina we ya ne. (Aposolo 12:17, 15:4, 13-21, Galesia 1:19, 2:9) Ido Yuda wenina Yesu holi hikito muwabo ya Yesu uwolafo-mota yasi hena naba li mofu betiyato, mikau-mikau upatoti uwabo wenina ya lufuwa me ya i fulo betibo, ya Yesu holi hikito muwabo wenina ya mona dowo molanabo yakafo Yesu weninala ona hula minae, loto li oloto pi betinaiye, loto monawa api itibibo ha ya lufuwa me ya i fulo betibo ne.

Lo oloto molaibo ha

¹ Aiyo, hemotina Isilaeli wenina afu monalo-monalo tuwelu (12) ya upatoti mino liti uwabo, ya nemo Yemusi, Goti ido Wenaba Yesu Kilisto houba-nabatina we ya lufuwa meu ya aiyo-weiyo ha i fulo betiyowe. Walo.

Hena o lumuto fedagetoma lute-hate li auba i ledanaibo ha

² Ena mono weninane-motao, hena mona-mona lo hemotinaloka fedagetoma, lute-hateu dowa loto holito minanune, loti feti hatina hiyalo. ³ Holi hikite ya hepa molo munaibo yakafo lute-hate li auba i ledanogolaiye, loti holabo yagunu lutina-hatinau ya dowa loti holiti minalo. ⁴ Ido lutina-hatina auba inaibo yakafo onona liyageto hemotina gedoti minabo monatina fefe lotoko minomo yoto ya heleutámanogolaiye.

Ha manadeu hefola nebo yagunu Goti lomunubo ha

⁵ Ena hemotina ha manadeu ya hefola nenako, loti, idafa-adafa yaidanagunu ya holito Goti loga o edonibo wenina muki ya hanu lomámoto, aifa lumu-lumu aibo we ya ha manadeu ma molo lumunabe? loti loga o edanabo ya moda binogolaiye. ⁶ Ido ha manadeu ma lumunabe? loti loga o edanigilima ya hatina loiti-loiti kiyámoti, holi hikito muti lomuilo. Wenina hatina loiti-loiti kiyabo ya no halafu ibo asikafo li upatito fokito wibo yaidana oti minae. ⁷⁻⁸ Aya weninawa hatina loiti kiyabo ya idafa-adafa muki ado weudinalutina-hatina auba iyámibo wenina minabo ne. Feti minabo nenako, Wenaba nedokati idafa ma linubo ne, loti hatina kinabo ya ma liyámanigilae.

Idafa-adafa wa nabo ido wa námabo wenina hatina

⁹ Ena hemotina mono weninate hulitina lumuto nebo wenina ya Gotikafo li akaisa o betibo yagunu ya lutina-hatinau dowa loti holilo. ¹⁰ Ido idafa-adafa wa nabo wenina ya idafa huwawa gululudoto limo ibo yaidana oti fulinabo nenako,

yagunu hemotina idafa-adafa wa nabo wenina ya Gotikafo li yoima o betibo yagunu lutina-hatinau aifa dowu loti holilo. ¹¹ Holi minafe? Fo yoto gedoto libo yakafo huwawa megunito gululudoto limo ito idafa omonala dowama u hopa wibo yamaidana oti idafa-adafa wa nabo wenina ya onona hofalau piti fulinigilae.

Hena naba lumuto fedibo ha

¹² Ena hena naba o bito fedibo ya auba iti minomo uti lumu fou ladámabo wenina ya Gotikafo dowu loto wa betito, lutina-hatina nomabo wenina ya hofawa minomo yowabo helekamu ya binowe, loto lo molo ledaibo helekamuwa ya linabo yagunu moda dowu loti holimo yowae.

¹³ Ena hepa molo lumunaibo hamenalo ya Gotikafo hepa molo ledaiye, loti ladámilo. E'e, idafa nosámibo yakafo Goti hepa molo edanaibo ya ogofuwámiye. Ido Gotikafo ya hepa molo ledámanaibo ne. ¹⁴ E'e, wenina muki ya eimotina dowu holabo mona yakafo hanu dowu loto yati ika o betito ya hepa molo biye. ¹⁵ Ena lalo holiyonibo mona ya wenipa olufotina houmatinau nebo yaidana oto nosámibo mona ya hedaiye. Ido olufu naba yoibo yaidana oto nosámibo mona naba lito ya fulimo uwonibo mona ya hedaibo ne.

¹⁶ Aiyo, lune-hane biyobo mono weninane-motao, yaidana mona yakafo hote itanaiye, loti hatina kifefe lalo. ¹⁷ Fefe loto dowu nebo idafa-adafa muki aifa lumibo ya Metefo okulumalo lamena muki li oloto pibo we nedokati lumibo ne. Ido Metefo monala ya lamena aido idafa hamamuna ya hamena ma fana uto ido hamena

ma fouma wibo yaidana oto minámiye. E'e, emo monala u eito-eito aguwámiye. ¹⁸ Eimola hala dowá kito ya hofawa oloto pinae, loto hala ona hula yakafo hofawa li oloto pi ledaibo ne. Feto fe ledaibo, ya miguti idafa hula libo hana liyonibo yaidana oti hemotina ya wenina, idafa-adafa muki li oloto piyogu yauti u homu hana li oloto piyobo weninane minanae, loto feto fe ledaibo ne.

Holi hikitabo wenina ya Goti hala holiti meyalo molanabo ha

¹⁹ Aiyo, lune-hane biyobo mono weninane-motao, holifefe loti holilo. Hemotina muki ya ha aloko-aloko ladámilo. E'e, masi ha lanabo moda aloko holifefe loti holilo. Ido lutina-hatina ya aloko hala-kala ladámaneyo. ²⁰ Moda holiyafe? Lute hala-kala lagetoma, Goti mona fefe libo molanae, loto holibo monawa ya molámanogolone. ²¹ Yagunu fuma ibo mona muki ido mona nosámibo oloto pimo wibo ya metina muti, you loti minoti, Goti li nomudina wanaibo hala lutina-hatinau molo betibo ya holi hiki loti liyalo.

²² Ido Goti hala ya holiti welalo hololalo. Heimotina lutina hola iti hatina etuwaloko holiyámilo. ²³ Moda holiyafe? Wenina masi Goti hala ya holiti welalo hololadámabo wenina ya noku hotina-wetina hamamuna wabo wenina yaidana oti minae. ²⁴ Aya weninawa hotina-wetina hamamuna wati uwafa, aloko hotina-wetina waboma ya hatina molaibo ne. ²⁵ Feto fe minafa, ido wenina masi Goti lo molaibo hala, ona fefe libo ha, wina ledaibo ha ya wafefe

lomo uwabo ya holiti hatina molámageto, fefe loti meyalo moloti moni minabo wenina ya idafa-adafa feyanabo ya moda dowá loti holi minomo unigilae.

²⁶ Ido we makafo mono holiyobo we minowe, loto holifa, ido wela wato hiyaba ámibo ya eimola lula-hala hola inako, yagunu mono holibo mon-ala ya u aifa idafa unogolaiye. ²⁷ Metefo Goti onobalalo ya mono mona hula feke loto hiluwa ona libo ya feito ne: Olufo nabunagi wena-hiyonagi hena naba holitanae, loto milumatina holito hiyaba o beti-beti anubo, ido mikaloka mona yamo li fuma i ledotanaiye, loto ute-weude-lute-hate wato hiyaba o-o minanubo mona ya mono mona hula feke ona libo ya ne.

2

Wenina muki ayaidana otoko lute-hate binuboha

¹ Ena mono weninane-motao, hemotina Wen-abate laménala naba-naba nebo we Yesu Kilsto ya holi hikito muwabo yagunu wenina hona moloti ekei ámilo. ² Moda holiyafe? Hemotina mono numunatinau we loiti yowaibo, ma ya ulalo owo dowá holoito analo idafa pana hibo golaibo we yoito, ³ ido ma ya idafa wa námiboma nenako, yagunu ulalo owo nosámibo holoito yowageyama, hemotina we ma ulalo owo dowá holoibo we ya dowá loti wa edoti, dowae lalowe, eba dowá lo melo ya amedoto mino, loti lomu-wafa, ido idafa wa námibo we ya yolalo sinoi mino, loti lomunafemo, ido aifa mikalo hidelo amedoto mino, loti lomunabo, ⁴ ya lutina-hatinau nosámibo holiti

wenina ya hona moloti ekei abo mona ya molone, loti holámafe?

⁵ Aiyo, lune-hane biyobo mono weninane-motao, holilo. Goti lutina-hatina muwabo wenina yasi emo wehudite weninala hiyaba o ledaibo ebalá ya linae, loto lo molo betibo we yakafo mikaloka idafa wa námabo wenina wa molo betibo, ya holi hikitina wa nanae, loto, ido aya ebane weune fi betiyobo ya linae, loto wa molo betibo ya ma holiyámafe? ⁶ Feto fe betifa, ido hemotina ya idafa wa námabo wenina eleka fi biyabo ne. Hemotina li yoima o betiti, ha li fefe lo-lo abo numudo idipiti uti sigiya lo betiyabo wenina ya hema ne? Idafa wa nabo wenina yasi fetó fe beti-beti ae. ⁷ Ido aya weninawa yasi Kilisto huliya dowa hemotina bibo huliya ya hamana hi-hi abo ya holiyámafe?

⁸ Goti hiyaba we wehudi lo molaibo hala naba ya fetó libo,

Heimokagunu holiyanibo yamaidana oto weni-naka muki ya luka-haka bi-bi o mino, loto ha mono lufuwau (Wkp 19:18) nebo ha ya hemotina meyalo molayama ya moda dowa loti minanigilae. ⁹ Feito nefa, ido hemotina wenina hona moloti ekei inabo ya moda nosámibo mona moloti, lo molaibo hala holiti holámoti abo yagunu hawa yakafo li sigiya lo betinogolaiye.

¹⁰ Aya yagunu holilo. Goti lo molaibo hala muki ya meyalo molanabo nefa, ido hawa yauti ma mako holi fulitanabo yamo u muki holi fulitabo wenina lifima liyagu yau hemotinagi maina linigilae. ¹¹ Moda holiyafe?

Hume-ugele ámiilo,

loto lo molaibo we yakafo ha ma yagi,
 Wenina hofu beti fuliyámilo,
 lotu lo molaibo ha ya ha mono lufuwau (Kis 20:13-14, Lo 5:17-18) ya nebo ne. Yagunu hemotina ya hume-ugele ámafa, ido wenina ma hofu beti fuliyabo ya moda lo molaibo hala ya holi fulitae.

¹² Feito Goti lo molaibo hala wina ledaibo ha yakafo li halo molo ledanogolaiye, loti holi minanako, yagunu ha lanabo ya moda wati hiyaba otiko lo-lo minalo. Ido mona molanabo yagi moda wati hiyaba otiko mona molo-molo o minalo. ¹³ Moda holiyafe? Hemokafo weninaka milumatina holiyámananibo ya Gotikafo ayaidana oto milumaka holiyámoto, moda lifima ha li humunogolaiye. Yagunu milumatina holilo. Ido milumate holibo mona yakafo lifima ha li lumunaibo mona li yoima o edanogolaiye.

Mona dowa molámanubo ya holi hikitonibo mona u aifa idafa unaibo ha.

¹⁴ Ena mono weninane-motao, we makafo nemo Goti holi hikito muwowe, lotu lifa, ido mona dowa molámanaibo ya igaidana oto dowa lotu feyanaiye? Aifa hawa yamo li nomuna wanaibo nefe? ¹⁵ Hatina kiyalo. Mono weninate ma ulalo owo wa námoto, wela-idafa minámagetoma, ¹⁶ hemotina yauti makafo fetu lotu lomunaibo, Luka-haka you lagetoto minoto, uka li mumusi lotu, ukalo owo holoito, weka-idafa nanani uwo, lotu wela-idafafena ulalo owofena umámoto, ya ha lomunaibo yakafo igaidana oto ana li faka lanogolaiye? ¹⁷ Ido ayaidana oto holi hikitaibo mona yako moloti, ido

mona dowā yagi molámanabo, ya holi hikitina ya moda fulitaibo idafa ne.

¹⁸ Ido we makafo, hemo holi hikika ya mino hedageto, ido nemo monane dowā ya mino nedaiye, loto lanaiye. Mona dowā molámanibo yagunu holi hikika igaidana oto nilibiyageto wanowe? Nemo monane dowā molobo yakāfo holi hikine ya hilibiyoto wanogolane.

¹⁹ Hemotina Goti mako ne, loti holi hikitabo ya moda dowā loti holiyafa, ido Satani himiwela muki ya ayaidana oti holi hikitabo yagunu holi bito, utina ololo o minae.

²⁰ Hemotina hatina hopa-napa hiyabo wenina, holi hikitafa, ido monatina dowā molámabo yagunu ya holi hikitina ya u aifa idafa unogolaiye, loti holiyámafe? Ha me ya lobinobo ya holilo.

²¹ Awatefo-holofate Abalahamukafo Goti sokila hi munowe, loto hipala Aisaka ya mono folomolo molaito ya Gotikafo watoto, monala fefe libo we ne, loto lo edaibo ne. ²² Yagunu holilo. Abalahamu holi hikitibo yagunu Goti lomuibo ha yagi meyalo molaibo, ido monalawa molaibo yakāfo holi hikila ya li fefe lo edaiye. ²³ Feito ya,

Abalahamukafo Goti holi hikito muibo yagunu monala fefe libo we ne, loto lo edaibo ne, loto ha mono lufuwau (Stt 15:6) nebo ha ya ayalo iye. Ido wenina ya Abalahamu ya Goti yolawe ne, loti lo minae. ²⁴ Yagunu holilo. We ma aifa holi hikitibo yagunuko ya monala fefe libo we ne, loto lo edámānaibo ne. E'e, monala molanaibo yagunugi ya monala fefe libo we ne, loto lo edanaibo ne.

²⁵ Ido Yosuwakafo momona oti uti uwotefo-mota aubatina ya wati loti lolumilo, loto Isilaeli we loiti itibi molaito uwaibo, ya hopa li uno-uno aibo wena Lahapukafo numunalau ya aifa li dowo lo betito, weninane yasi hofu betitanae, loto li fulu hano eito betito ya Gotikafo watoto, wena ya monala fefe libo ne, loto lo edaibo ne.

²⁶ Yagunu holilo. Utina weudina mino betiyámíto ya moda fulitaibo yaidana oto ya ma holi hikitafa, monatina dowo li oloto piyámabo ya holi hikiti-nawa yagi ya moda fulitaiye.

3

Ha lanubo ya wato holifefe lotoko lanubo ha

¹ Ena mono weninane-motao, ha mono api itibiyabo onona ya hotibo idafa minámíbo ya-gunu hemotina yauti onona yaidanalo muki bu-liyámílo. Ya neidafaito ne? Aifa wenina ya lifima ha binogolaifa, ido ha mono api itibiyoníbo wenina ya hawa moda holitonima nenako, ya-gunu lifima ha liwila oto lumunaibo ya you loto lomámanogolaiye.

² Ena leimo muki ya oto moloto oníbo monate mona-mona ya moda u fefe ladámíbo ne. Yagunu we makafo ha u fefe liboko lanaibo ya eimola ula-weuna-lula-hala muki hiyaba dowo loto, monala fefe loto molomo yonogolaiye. ³ Safu-hosi ya hate li meyalo molanaiye, loto welau nala hefola welau moloto, yalo unune, loto holiyonído ya nala ika ogeto, Safu-hosi ya moda meyalo moloto, ula naba ya li elepa ito ayalo ya wiye.

⁴Ido sipi yagunu hatina kiyalo. Sipi naba-naba idafa ya asi nabakafo fu loto lito no mulalo ya wibo idafawa hola iti li ya-meya abo idafa ya hefola efolako nefa, sipi lito monibo we yakafo yaleka unowe, loto hala kinaido ya hola ibo idafa ika yaleka itaibo, moda ayaleka ya wiye. ⁵Ido ayaidana oto uteu wete huluma ya hefola idafa nefa, eimola huliya li faka loto ha naba-naba lomo wibo ne.

Hatina kiyalo. Hofuku ya so huluma hefola efoma limo ibo yakafo lomo uto uto yá-nala suwafena muki ya so liye. ⁶Ido wete huluma yagi so huluma ya ne. Ute-fate negu wete huluma ya hefola idafa nefa, nosámibo mona naba-naba li oloto pibo ne. So fiyámanaibo ebau yati oloto piboidana oto ute-weude-lute-hate ido oto moloto onibo monate muki ya li hopaitaibo ne.

⁷Muki liye-idafa-adafa, liye-hafafena, nama-afafena, hosofafena, noku-idafafena, muki ya wenina masi hiyaba oti li you lo beti minafa, ⁸ido wete huluma ya li you lanaibo we ma minámiye. E'e, wete huluma ya onona nosámibo naba lito monito, wenina hofu beti fulinaibo mona ya emodoka nebo ne.

⁹Wete huluma yakafo Metefo Wenaba ya ebola lo minoba, ido weninate Goti fefelumala minabo wenina ya li hopa o betinubo ha lo betiyone. ¹⁰Feito wete mako yautiko ha loiti yoibo, ya ebola ha ido li hopa o betinubo ha ya lo-lo o minone. Aiyo, mono weninane-motao, aya monawa ya fefe ladámiye. ¹¹No atala mako yautiko ya no dowagi ido ho nogi maina lumunaife? ¹²Ido mono weninane-motao, yá sigolokafo ya olifi

ilawa inaiife? Ido nala waini yakafu sigolo ilawa inaiife? E'e, feito minámiye. Ido ayaidana oto ho no atalau yati no dowá lomámanaibo ne.

Mona dowá ya Goti nedokatiko aibo ha

¹³ Ena hemotina minagu yati hema ya ha mananau neto holifefe loto holibo we ne? Aya we ya ula-huliya ya ito lumuto mona dowá loto oto moloto anaibo mona dowá yakafu ha mananau nebo monala ya lilibinaibo ne.

¹⁴ Ido lutina-hatinau ya wauwa ekefa liyabo mona ido heimotina utina-hulitina li faka labo mona ya mino betiyagetoma, ha manadeu ne, loti ake iti ha ona hula metina muti sugi loti heimotina luwatina ladámilo. ¹⁵ Aya ha manadinau nebo monawa ya okulumau Metefodokati lomámiye. E'e, mikaloka me ya weninalokati ido Satanilokati aibo mona ya ne. ¹⁶ Holiyafe? Wauwa linabo mona ido eimotina utina-hulitina li faka lanabo mona minaidoka, yalo ya hopa moniyabo mona ido nosámibo mona muki ya li oloto pinabo ne.

¹⁷ Feito nefa, ido okulumau Metefodokati ha manadeu nebo mona ya homu ya lute-hateweude-ute hiluwa libo mona ya ne. Ido yaloti ya holoto latawa ito, you loto minoto, ha holito, wenina milumatina holito li dowá lo betinubo mona lute-hateu faitibo mona, hate loiti kiyámoto, monona loiti iyámonibo mona ya ne.

¹⁸ Ido yufa dowá hifiyato fokito yoto ilawa hulawa ibo linabo yaidana oto lusaku molo betibeti o minoto you libo mona molanubo ya monate fefe lomo yonaibo hulawa linune.

4

Mikaleka idafagunu holabo wenina ya Goti uwolafo buliyabo ha

¹ Hemotina minagu ya fina lowa fiyabo mona ido moliya fiyabo mona ya igalekati oloto piye? Heimotina lalo holiyabo mona yakafo lutina-hatina-weudina-utinau lowa-fina fidokati ya oloto pibo ne, loti holiyámafe? ² Idafa-adafa feito-feito linubolae, loti holiti monimo uwafa, ido liyámae. Liyámanako, yagunu hofu beti fuliti wauwa liyafa, ido ogofuti liyámoti, ha moliya fiti fina fiyae. Holilo. Hemotina idafawa yagunu Goti lomuwámanako, ya liyámae. ³ Ido lomunabo, ya ake inune, loti lutina-hatinau mikaloka idafagunuko holimo yowabo ya yaidana-meidana idafa linune, loti labo ya hopa lomuwanako, moda liyámae.

⁴ Aiyo, hemotina Gotigi kelone, loti lafa, ido wenipa li hopa uno-uno oti moniyabo yamaidana oti mikaloka idafa-adafa lutina-hatina mu-mu oti moni minabo mona ya Goti uwolafo buliyabo mona ne, loti holiyámafe? Yagunu mikaloka idafa-adafa lute-hate munune, loti holinabo wenina ya Goti uwolafo buliyabo ne. ⁵⁻⁶ Ido Gotikafo weuna molo ledaibo, ya nemoko lutina-hatina numunae, loto auba ito holito, ido aifa li dowu lo ledaibo mona ya mulalo-mulalo oto molo ledomo yoibo ne, loto ha mono lufuwau lolumibo ha ya aifa ha ne, loti holiyafe? Feti holiyámilo. Aya yagunu ya fetu libo,

Eimotinasi utina-hulitina iti yowabo wenina ya
 Gotikafo fina fi betito, ido eimotina utina-
 hulitina iti lomabo wenina ya aifa li dow
 lo beti ne,

loto ha mono lufuwau (Snd 3:34) ya nebo ne.

⁷ Yagunu ya hemotina utina-hulitina iti lu-
 muti Goti halalo meyalo molalo. Hamade hi-
 hi aibo we Satani ya fina fi muwato, moda fulo
 betitoto holi unaiye. ⁸ Lutina-hatina Gotidoka
 molo muwato, emo yagi hemotinaloka molo bino-
 golaiye. Hemotina adina noku iyabo yaidana
 oti mona nosámibo molabo ya moda fulitalo.
 Ido hatina loiti-loiti kiyato lutina-hatina li fuma
 ibo mona ya hilili oti hiluwa lagetó minalo.
⁹ Hemotina lifimatina yagunu hena naba-naba
 fuliti ei-ai loti hufo naba alo. Hiya abo monatina
 li elepa iti hufo nama loti minalo. Ido dow
 holiyabo monatina li elepa iti hena naba holilo.
¹⁰ Wenaba onobalalo ya heimotina lutina-hatina-
 utina iti lomato, ya emokafo li faka lo betinaibo
 ne.

Wenina hamadina hiyámanubo ha

¹¹ Ena mono weninane-motao, wenina hamad-
 ina hiyámilo. Goti weninala hamadina hiti hona
 molanabo wenina ya lo molaibo ha yagi hamana
 hiti hona molae. Yaidana abo wenina ya lo
 molaibo hawa ya meyalo molámæ. E'e, hawa
 hona molo-molo o minabo mona molae. ¹² Ido ha
 ya lifefe loto hona molo ledoto anaibo we mako
 ya ne. Aya wewa yakafoko li nomude wa ledoto
 ido li hopa o ledoto anaibo ya moda ogofuto ne.
 Feito hemotina ya igaidana wenina minoti ya
 weninate hona molanune, lae?

Leimo hulite li faka ladámanubo ha

¹³ Ena hemotina minagu yauti masi feto labo, Onesafe, ledafe numuna malo uto melege mako mino itoto idafa-adafa limo oka waka oto wa nanubo onona linubolae, loti hatina ki-ki abo weninama ya ha me ya lanobo ya holilo.

¹⁴ Hemotinaloka ya leda oloto pi binaibo idafa ya ma holifefe ladámae. Ido hofawa minonibo mona ya neidafa aibo idafa ne? Sokila yoibo ya oloto pito hamena hefola efoma mino itoto hulibo yaidana oto hofawa minonibo mona ya feito ne.

¹⁵ Feito hemotina ya Wenabakafo hala dowá kito yaidana anae, lanaibo ya nomude hofawa minoto idafa yaidana-meidana feyanune, loti lanabo ya fefe lanaibo ne. ¹⁶ Feito nefa, ido hemotina ya heimotina luwatina loti hilitina li faka lo-lo o minae. Aya monawa ya nosámiye. ¹⁷ Yagunu holilo. Wenina yasi fefe libo mona ya holiyafa, ido monawa ya meyalo molámanabo ya lifima moda mino betinaiye.

5

Idafa wa nabo wenina hatina

¹ Ena hemotina hefana-huwamena wa nabo wenina ya ha me ya lanobo ya holilo. Hamena nabalo hena naba hemotinaloka oloto pinogolaibo yagunu holiti ya hufo naba oti ei-ai loti minalo. ² Idafatina wa nabo moda lilitito, ido utinalo owo ya hanu sisigafakafo moda no hu-loitaibo ne. ³ Ido goligi ido siluwagi lifefe labo idafatina ya moda yufa litaibo ne. Yufa libo monawa yakafo nosámibo mona molabo ya li oloto piyageto, sokafo ute libo yaidana oto utina

li hopaitanogolaiye. Hamena hulanowe, loto feyaibo hamenalo ya hemotina mikaloka idafa yagunuko holiti li nuba naba iyabo ne.

⁴ Holi minalo. Hemotina onodo we midinau ya wetina-idafa liyabo onona meinatina fefe loti biyámabo yakafa sigiya lo betibo ne. Weninawa ononatina liyabo hatina ya Wenaba aubafobo libo we ya moda holi ne.

⁵ Hemotina mikaleka minoti ya unoti sinoiti nomudina fulibo idafa-adafa li nuba oti no hulo itoto dowa loti holi minabo, ya safu idafa-adafa muki muwato no-no ito naba lito waito, hofu fuliyabo yaidana oto hemotina hamenatina ya moda alili aiye. ⁶ Hemotina ya monatina fefe libo weninama, holi nosámibo biyámabo wenina ya li halo molo betiti hofu beti fulitabo ne.

Lute-hate li auba i edoto Wenaba hiyabala anubo ha

⁷ Feito mono weninane-motao, Wenaba hofa liwila oto anaibo hamena ya auba iti hiyabala omo yoilo. Migu yufa idafa hifi-hifi abo wenina yasi auba iti hiyaba omo hula naba lito oloto pinaido uwabo monatina yagunu hatina kiyalo. Hemotina ya homu ho ibo hamena ido aliga ho hofa inaibo hamena auba iti hiyaba omo uwae. ⁸ Ido ayaidana oti hemotina Wenaba hofa anaibo hamenala alili aibo yagunu holoti hiyabala oti lutina-hatina li aubafobo loti minalo.

⁹ Ido mono weninane-motao, holilo. Hona molo-molo aibo we moda hanudo neboma nenako, lifima ha liwila oto lumutanaiye, loti ya heimotina ha nosámibo lo filiga-filiga o betiyámilo. ¹⁰ Mono weninane-motao, Wenaba

welaloti ha labo we polofeti ya hena naba-naba oloto pi biyado ya auba iti holoti minomo yowabo monatina yagunu hatina kiyalo. ¹¹ Wenina hena naba o bito fedibo hamenalo ya holi hikitoti auba iti minabo wenina yama moda dowo loti holimo yowae, loto holiyonibo ne. Homu aidena we ma huliya Yopu ya hena naba-naba holifa, ido holi hikitoto auba ito minomo yoito, aliga Wenabakafo li dowo lo edaibo ha ya moda holitama ne. Feito ya Wenaba mulunau holibo mona ido milumate holibo mona faitoto mino edaibo yama hemotina moda holi minabo ne.

Huliya ya loto ha ma li onae, loto ladámanubo ha

¹² Ena mono weninane-motao, ha naba me ya ne. Hemotina wenina ma ha lobinigilima ya okuluma huliyafe, ido mika huliyafe, ido idafa-adafa yaidana-meidana huliya ya loti hawa ya li onae, loti ladámilo. Hemotina O, lanune, lotima aifa O, loti, ido E'e, lanune, lotima aifa E'e, lanabo ya Gotikafo ha naba liwila oto biyámanogolaiye.

Monatina fefe libo wenina yasi Goti lomunabo ha

¹³ Hemotina minagu yauti masi hena holitima, Goti ya lomuilo. Ido lutina-hatinau dowo holitima, Goti ebola loti nama lalo. ¹⁴ Ido hemotina minagu yauti makafo idafa i hiliyagetoma, ya monolo nuba abo hiyabatina we sutina fiyato, loti ya Wenaba huliyafo ya yá nowala ulalo wiliti ya idafa i hilibo yagunu holiti Goti lomuilo. ¹⁵ Feto loti lomunabo ya holi hikito muwanako, Wenabakafo holito ya idafa i hilinabo wenina ya

li faka lo betito, ido lifimatina mino betiyagetoma ya hilili o betinaibo ne.

¹⁶ Yagunu hemotina mona nosámibo molabo yagunu mono weninatina lo oloto molo biyato, emotina yasi hemotinagunu holiti Goti ya lomuwato, lifimatina hilili o betito ya idafa i hiliyabo li faka lo betinaiye. Holilo. Monatina fefe libo wenina yasi Goti ha lomunabo ya u aifa idafa aguwámanogolaiye. E'e, ha lanabo ya Gotikafo moda holinako, yagunu lomunabo hawa ya aubafobo libo idafa ne.

¹⁷ Polofeti ma huliya Elaiya ya labo aifa mikaleka wenina yaidana oto nefa, auba ito holi hikitoto minoto ho iyámanaiye, loto Goti lomuito, ya moda melege tili hafu (3 1/2) yalo ya mikaleka ho iyámiye. ¹⁸ Ido hofa aliga Goti lomuito ya okulumakuti ho ito mikau yufa idafa-adafa fou loto yoibo ne.

We ma hanu dowa fulitanaibo ya hofa liwila oto ilimito anubo ha

¹⁹ Ena mono weninane-motao, hemotina minagu yauti makafo ha ona hula hanula fulitoto eito uwagetoma, masi hofa liwila oti ilimiti anabo ²⁰ ya fetu loti holilo: Lifimala nebo we ya hanu nosámido monibo, yaloti ya we masi liwila oti ilimiti ato, aya wewa lifimala muki ya Gotikafo hilili o edoto, fuliguti li nomuna wanaiye, loti holilo. Modae.

Goti Ukuwala Hala
The New Testament in the Lambau Dialect of the
Siane Language of Papua New Guinea
Nupela Testamen long tokples Siane-Lambau long
Niugini

copyright © 1997 Wycliffe Bible Translators, Inc.

Language: Siane-Lambau (Siane)

Dialect: Lambau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

PDF generated using Haiola and XeLaTeX on 11 Nov 2022 from source files dated 22 Nov 2019

293a493a-a8ae-5f22-be32-d1a5995e2a0e